

辛  
壬  
春  
秋

王士珍題



捌

君而死也。顏杲卿之守常山死。張巡之守睢陽死。忠國而死也。古之人蓋視君爲至重。謂忠君卽所以忠國。忠國卽所以忠君。君與國常不分。自孟子始分晰言之。曰民爲重。社稷次之。君爲輕。然自秦漢以來。孟子之說仍未大昌。則以君權太重。學者無敢引申其說。今以排除君權之故。謂君不必殉。因并謂殉國者之亦爲非也。烏乎可哉。又况忠君者之不果爲非哉。余觀辛亥殉難清臣。其大吏死職。及武臣被戕。或執戈戰死者。類皆殉國者也。至郡守縣宰。當大吏逃亡之後。督率無人。監司失主。進退尤可自專。而不逞之徒。冀地方亂肆爲謠謬。情

勢危疑當此之時郡邑紳耆於地方長官無論賢否皆攀轅臥轍泣涕挽留而不使去而爲之牧宰者恆亦不忍恝置之也乃不幸猝與禍會焉是忠於民而死也忠民卽所以忠國意尤矜之故備列焉而竟佚其名與亡其事實者亦不少也可勝歎哉至於義可以不死而竟死者其執義雖少狹其守道則甚篤其操持亦足以風厲末俗故並及之作清臣殉難記

吳北江云清臣黨人二記網羅放失發潛

闡幽有功世道人心甚大  
亦史家不可少之著作也

程彬字筱竹江西樂安人湖北候補巡檢充武昌游民習藝所所長宣統三年署鮚魚司巡檢八月十九日夜

新軍構變。巡檢署居城南。見火起。從役往救。至望山門外。突遇礮隊入城。皆袖纏白布。彬大駭。厲聲問曰。汝等反耶。眾舉槍擬之。彬益前致詰。遂見害。武昌首起兵。大吏瑞澂最先走。故官吏被難者。文職只程彬一人。武職工程營督隊官阮榮發。黃坤榮。排長張文濤。亦卽夕被戕也。

劉錫祺。字佩之。直隸天津人。以道員發湖北。入將弁學堂。畢業充第八鎮正參謀官。質直詳慎。處事無回曲。爲各營所推重。光緒三十二年。南北軍會操河間。錫祺籌度分部。悉合機宜。加正參領銜。自湖北治新軍。總督張

之洞以張彪爲統制。彪起家巡捕，治軍飾外觀，不省恤士卒。革命黨人陰施煽動，莫有固志。錫祺心憂之，而莫能匡正也。宣統三年夏，黨人破獲，輒株連陸軍。瑞澂不知大體，恣意捕殺，人人危懼。八月十九日夜兵變，瑞澂、張彪相率走武昌獨立。時錫祺方赴沙市催餉，二十六日回武昌，各營聞錫祺歸，爭往謁趣。令見元洪，錫祺正色曰：「國家歲費鉅餉，練兵原期爲國干城，禦外侮，奈何受人煽惑，爲叛逆乎？」君等勉之。吾不能爲君等所爲。眾怒研殺於座中。事聞，贈協都統。錫祺旣不附從革命，則不宜復歸以自取死，豈

有所劫不得已乎？此中必尚有他故而傳者失之。

張曾疇江蘇無錫人生七日失母故字望屺少好學工書由諸生入湖廣總督張之洞幕中奉職勤慎爲之洞所倚信凡奏稿多出其手積勞保知府補用道三年八月武昌軍起總督瑞澂棄城匿兵艦中時曾疇方主漢口貨捐局事瑞澂索供張局帑爲罄局當礮火衝員司星散曾疇避租界中輾轉赴滬居二月復返漢簡料局事民軍邏者蹤跡之曾疇覺卽登輪返滬邏者復尾隨之至黃州遽出偪返漢曾疇諾之易輪上駛時方深夜邏者指曾疇編髮誚辱之詞穢難堪曾疇歎以酒食乘不備投江死後其家得其尸於團風鎮

張景良湖北黃陂人將弁學堂畢業生游學日本歸充  
湖北新軍標統鄂軍之變初僅工程營百數十人餘應  
者鮮而總督瑞澂提督張彪倉皇遁城內搶攘無主於  
是各營相繼起歸民軍擁立都督設軍政府旣獨立景  
良說都督黎元洪曰人民革命望立憲耳今朝廷旣允  
立憲付與民權似不宜更言革命公受知遇久諸將聽  
公盍三思之諸將聞言皆怒欲殺景良元洪不得已禁  
之署中未幾北軍攻漢口急景良請赴前敵自效且以  
妻孥爲質會總指揮何錫藩戰創不能軍乃以景良代  
錫藩戰漢口甫交鋒前敵陣動景良遽揮後隊大呼曰

前敵敗矣後隊速退否則全覆眾聞言大奔人馬相填  
藉泊陽邏兵艦以大礮乘之死亡益多大智門遂爲北  
軍所奪諸將言狀請誅景良景良臨刑仰天呼曰某今  
日乃不負國矣神色夷然

桂蔭字積五滿洲鑲藍旗人以內閣中書充軍機章京  
擢刑部郎中簡湖北施南府知府移安陸安陸領四縣  
堤工年久頽廢桂蔭至周厯全堤見水齧隄成漩渦狀  
極險乃瀝陳大府得巨貲尅日興修親督工河干昕夕  
無懈翌年堤成水盛漲四縣獲全以故安陸士民尤親  
附安陸爲襄樊門戶故無兵宣統三年武昌軍亂桂蔭

與鍾祥縣知事田芸生招集團防並請兵於襄陽道喜  
源調操防軍馬步五營至而以劉文玉爲統領已而德  
安荊州先後陷劉英據天門戕知縣榮濬風聲愈惡喜  
源復遣鄖陽陸軍百人來助防陸軍管帶張楚材排長  
白星垣雄黠有異志肘腋之患最爲難  
防言之可爲世鑒時訛言蠭起餉

糈艱乏統領劉文玉恆怯不能軍出巡潛江遇武昌逃  
軍則駭走十一月戊辰各軍官計事縣署楚材陰遣陸  
軍圍府署槍聲作楚材謂文玉曰操防軍譁變矣統領  
曷出鎮撫之文玉倉皇出見執械者皆陸軍卽趨北門  
斬關走楚材星垣遂入署收知府印趣令去桂蔭朝服

率妻吉喇氏投署後井。井口隘不得入。乃趨文廟崇聖殿自縊死。初劉英據天門危急。或說桂蔭宜自爲計。桂蔭曰。吾與城爲存亡。脫不幸吾自有去所也。已而軍政府檄至。禁妄殺滿人。不抵抗者郡人咸喜。奔走來告。桂蔭笑應之。至是竟從容就死。安陸民黃芝船等感其義。爲營葬樹石。後其子柏壽來歸骨。士民悲思。復爲衣冠墓。封識其上。而就節孝祠故宇爲祠祀。其得民如此。

存厚字寬甫。滿洲正白旗人。監生。由內務府郎中選湖北宜昌知府。年餘以疾去。久之再選宜昌。厯攝漢陽黃州德安安陸知府。存厚在官廉靜不擾。再知宜昌。商民

尤親愛之。宣統二年解任。調筦襄陽張家灣榷局。三年十月癸亥。光化知縣黃仁炎至河口。與巡防營管帶周飛鵬籌練商團。陸軍兵士張國荃李秀昂十數人暴起。河口爲亂。飛鵬聞警出慰之。不服。飛鵬拔佩刀擬之。國荃遽開槍殺飛鵬。飛鵬字翔干。江西新建人。由武舉人從軍。爲襄陽防軍馬隊管帶。旣死。卽夕國荃刦黃仁炎。襄郡城。襄陽道喜源先一日假巡邊名遁。時襄陽官獨存厚與同知祥泰。祥泰出降。稽查長傅登喜。遽張白幟。局門。存厚揮家人避民家曰。吾嗣倘不絕。死無憾。兵勇入爭索金。金盡。李秀昂揮兵引至北門外校場殺之。子

三齡民軍挾之馬上疾馳亦驚悸死宜昌士民聞之流涕曰太守若不去宜者吾人護持之必不死補筆實回首邱萬牛也

山重

乃共集貲送其妾及其二子留宜者北還

榮濬字心川荊州駐防蒙古鑲黃旗人光緒甲辰進士用知縣發湖北宣統三年除天門知縣未到官縣人有造訪餽白金者值謁總督未歸其人留金去及歸命僕還其金戒勿復來其操行不苟如此未幾武昌亂有荆防旗人自武昌逸歸道天門述變兵仇滿人狀且爲榮濬危榮濬曰吾曹食國家餉二百餘年當有以報矧吾有守土責能守守之不能死耳不知其他乃集紳耆練

民團自保十月鍾祥民軍劉英率數百人來攻城陷被害

勞謙光山東陽信人北洋武備學堂畢業應聘教習山西尋充馬營管帶入貴爲知縣仍官山西山西風氣故樸儻新政創始謙光提倡力爲多以勞擢直隸州知州數歲改充北洋第三鎮參謀官移六鎮工程營管帶武漢事起率赴前敵築橋漢水上橋將成敵爭之力礮丸雨射謙光督視不少郤猝中礮卒謙光旣卒橋成師竟渡漢克漢陽謙光篤風義官晉時同里曾筱峯母歿太原殯不得歸後筱峯依謙光天津復遘危疾執謙光手

泣曰吾母未歸葬死不瞑目謙光慨然自任卒使人求其母喪與筱峯喪並歸葬擇其族人子爲之後陽信人至今義之

恆齡字有蘭號錫九滿洲正藍旗人荊州駐防先世揚古利以功封武勳王幼補旗籍生員由驍騎校累擢至協統旗員習多騎惰恆齡獨折節讀書光緒二十六年拳寇起黨人聞風煽亂焚沙市薹船及領事館稅關外國僑民多奔竄恆齡率二百人馳往誅首要散脅從護持避難外人亂遂定防營積弊久恆齡創編新軍設堂講武教習簡練氣象一新將軍綽哈布疏薦其才充營

務處總理加二品頂戴恆齡乃條具四事曰設警察以資保衛興學校以廣教育清財政以濟餉饋練常備以供調遣皆奏行復創設八旗高等學堂陸軍小學堂裁新軍陋規爲經費謁總督張之洞索助萬金訪延俊才聘充教習嚴立章條校風肅然學部攷察學務奏稱荊州爲第一尋充荊州振威新軍統領調充省城督練處參議將軍恩存總督陳夔龍交章稱薦後夔龍移督直隸調充北洋督練處參議宣統元年充熱河練軍統領汰冗補缺夙弊一空大盜葛蘭亭周洪果久稽誅恆齡至二月次第就擒推功將校已弗與二年簡寧夏副都

統朝陽士民呼籲請留鎮總督上聞朝命以西陲邊要  
弗許旣到官議開渠屯田裁旗歸農嚴煙禁設方畧甚  
備三年五月丁父憂馳歸迎父柩萬縣及行至宜昌而  
鄂亂適起道梗還荊州將軍連魁奏請幫辦軍務旋命  
署荊州左翼副都統恆齡以荊州川鄂咽喉襄樊屏蔽  
旣受任毅然以城守爲已責時民軍四起餉匱援絕同  
官狐疑皆不欲戰恆齡慨出私財餉軍獨督戰甚急  
十月丁酉敗宜昌民軍於草市復敗之萬城堤時方患  
癰晨夕裹創巡城血縷縷霑衣袂旣湘民軍王正雅亦  
率數營至民軍來益多攻愈亟旗卒多死亡亡者家屬

赴恆齡邸哭。詈恆齡城久圍米鹽乏。人心解體。恆齡仰天歎曰。人心去矣。臣力竭矣。惟殉身可以自明。十月甲寅。晨起朝服坐堂皇。發手槍洞胸死。死數日將軍連魁右翼副都統松鶴。開門納民軍。荊州失事。聞予謚壯節。荊州駐防官吏先後死難者。參謀德霈。統領松興。防禦多瑞。驍騎校金霖炳。安哲森。都司榮綿。舉人迎禧。

駱兆綸湖南江華人。爲蘄州吏。目能究知州中疾苦。人士賢否。官蘄二十年。爲厯任州宰所倚重。辛亥變起。知州已去。州民以兆綸在蘄久。遮留兆綸。兆綸以母老願送出境。還主州事。州民許諾。兆綸送母至漢口。復還蘄。